



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Russia foreign minister Sergei Lavrov-i Iran semdangtsü

Ben Shelton-i Japan Open kokogo



VOL. XXI NO. 16 (ADOK 16) DIMAPUR TENTONÜ (MONDAY) MONGPUTENI (OCTOBER) 23, 2023 ₹ 5.00

Netanyahu-i Hezbollah dang kümdangtsü ashir

New Delhi, October 22, 2023 (Agencies): Hezbollah-i Israel den rara menara parnok aser Lebanon atema teraksa jenti bentsür arutsü ta Israel prime minister Benjamin Netanyahu-i metetdaksüogo.

“Hezbollah ajanga Lebanon anioka regional war tuluba akümtsü akok. Ajisüaka Hezbollah-i kechi lemtet ka agidir ni memetet” ta Netanyahu-i ashi.

“Hezbollah-i Israel den rara menara ibaji parnok asoshi aibelen tulutiba asütsü. Parnoki mebilemdangba tashi agi onoki raratsü aser ibaji Hezbollah aser Lebanon atema takoksa ulura asütsü” ta pai ashi.

Lebanon nungi anti-tank missiles khaloktsü aser onoki drone ka puogo ta Israel sepaitemi ashi.

“Hezbollah-i lendong aketba mapa inyaker aser iba rara nung Lebanon aniokra takoksa jenti angutsü, kechiyong Lebanon den

arrtsü anasa alir Israel nunger 60,000 tema anienogo” ta Israeli Ministry of Defense-i metetdaksü.

Tanü anügang truck gari 17 aid convoy ka Egypt nung Gaza tongogo. Gaza nung kiojen 40% tema raksatsüogo mesüra samatsüogo ta United Nations-i ashir.

Anogo ana tsüngda Rafah crossing ajanga aid delivery ana tashi inyakogo. Yashi truck gari 20 aid convoy ka tongogo.

Gaza nung nisung 2.4 million nüngdakattem peritsütsü asoshi anogoshia truck gari 100 shi nüngdaker ta UN-isa metetdaksüogo.

“Israel-i ali nung raratsü atema sepai meyrjang aika anidenogo aser yasüng Gaza City aser temeket amakdang Hamas rocket network nung deputy commander dena kiralongrar aika tepsetogo” ta Israel military spokesman Daniel Hagari-i ashi.

Manipur CM-i Internet lapoktsü osang metetdaksü

Imphal, October 22, 2023 (Agencies): Manipur Chief Minister N Biren Singh-i internet noktanga aliba yakta lapoktsü ta metetdaksüogo.

Manipur sorkari yashi October 26 tashi maneni internet noktanga osang metetdaksü. Manipur sorkari yashi October 26 tashi maneni internet noktanga osang metetdaksü.

Manipur kübok tesem kar nung ozüng alema inyaksangshiba osang aliba ajanga internet services noktanga atsülangar ta shia liasü aser Manipur state police-i Honibarnü October 26 tashi internet noktanga tetuyuba agütsü.

May 5 nü Kuki aser Meitei nunger tsüngda rara adokba sülen Manipur nung internet services shibanga liasü. Iba sülen September 23 nü internet services lapok saka kaketshir ana indang noksatem prokshiba sülen anogo ana lir shibanga liasü.

Oct 24 nungi Nagaland nung tzünglu arutsü

Dimapur, October 22, 2023 (Agencies): October 24 nungi Nagaland den Northeast state asem nung tzünglu arutsü ta India Meteorological Department (IMD)-i metetdaksüogo.

October 24 aser 25 anogotem

Nagaland, Manipur, Mizoram aser Tripura nung tzünglu arutsü ta IMD-i ashi.

IMD-isa ashiba agi Nagaland kübok Peren, Kohima aser Phek district tem nung tzünglu teimba arutsü.

India-i Gaza Strip nung alir dangi humanitarian aid yok



October 22, 2023 nü India-i Gaza Strip nung alirtem dangi yokba humanitarian aid Egypt nung aliba El-Arish airport atongba sülen agiba noksa ka angur.

New Delhi, October 22, 2023 (Agencies): India-i Deobarnü Gaza Strip nung aliba Palestine nunger dangi humanitarian aid bener yokogo.

Hamas aser Israel tsüngda raraba India-i medical aid 6.5 tonnes aser disaster relief material 32 tonnes bener yok. Iba ya Egypt adena Palestine atongtsü.

“Palestine nunger dangi IAF C-17 tayimtsü ka nung medical aid aser disaster relief material bener Egypt nung El-Arish airport tashi apusoa ogo” ta External Affairs Ministry spokesperson Arindam Bagchi-i tanü metetdaksü.

India-i yokba osettemji Egypt aser Gaza tsüngda Rafah border crossing ajanga Palestine dangi yoktsü.

India-i yokba humanitarian aid

“life-saving medicines, surgical items, tents, sleeping bags, tarpaulins, sanitary utilities, water purification tablets aser tanga nüngdakattem dena lir” ta Bagchi-i ashi.

Iba mapa atema Ambassador of Palestine Adnan Abu Alhaija-i pelaba metetdaksüogo.

Hopta ana noktanga aruba ajanga Gaza Strip-i oxygen amala essential items meyokteter ta Alhaija-i ashi.

India-i nüngdakattem agütsüba ya Palestine nungeri kanga pelaa agizütsü kechiyong parnok i teyari kanga nüngdaker. Israel-i anogo 15 jungnüa mokdangba ajanga electricity, food, medicine aser oxygen meyokteter.

Onoki masüngdangaka India-i onok yarir. Iba ya mapa tajung lir” ta Ambassador Al Haija-isa ashi.

Egypt, Turkey and the U.S. dena linük aikati Gaza-i teyari yokogo.

India-i Palestine dangi yokba humanitarian aid Deobar nikongdang Egypt tongogo aser India ketdangsürtemi Egyptian Red Crescent ket nung agütsüogo.

Prime Minister Narendra Modi-i Palestinian Authority President Mahmoud Abbas den jembiba sülen anogo asem lir India-i Palestine dangi aid yokogo.

Brihostibarnü Mahmoud Abbas den jembidang PM Modi-i Palestine nunger dangi humanitarian teyari maneni yoktsü ta ashi.

Modi-isa Gaza Strip nung aliba mozü ki ka amakdang nisungtem asüba atema mangyimba lemsatet.

NEHU Tura campus nung ragging ken o bushisüngdang

Shillong, October 22, 2023 (Agencies): North-Eastern Hill University (NEHU)-i Tura campus nung ragging asüba atema bushisüngdang ka tenzüko.

Iba atema anti-ragging committee rondak senden ka mena investigation committee ka tentetsü lemtetogo. Iba committee ya Professor Lucy Zehol lenisüba kübok asütsü.

NEHU Vice Chancellor, PS Shukla-ia Tura campus semdangogo aser university ketdangsürtem o police den ajurutepa sensaksemogo.

Ajisüaka iba lendong nung timtem ajuruba nisung leave agiba ajanga bushisüngdang nung tetsükdaksü ajurur.

Iba tayongzükba atema NEHU ketdangsürtemi züngsem asemi akümba committee ka tentetogo. Iba nung Shillong campus aser Tura campus nungi faculty züngsem ana aser NEHU students body nungi kaketshir ka ta dena lir.

Iba committee yagi timtem ajuruba kibong dang nungi temelaba meshir Nagaland nung

pa den oa ajuruteptsü aser nüngdakba osang bendenba den teyari agütsütsü.

Ozüng alema inyakerem putetba sülen tapet temerenshi agütsütsü ta Professor Shukla-i nangzükogo.

Education Minister Rakkam A Sangma-ia iba tatalokba aitsüogo. Iba tatalokba atema bushisüngdang südar anungji kuli mangu tashi o mejembitsü. Tesüiba mapang NEHU nungibala tatalokba maliasü, ta pai ashi.

October 8, 2023 aonung NEHU Tura Campus nung Naga nunger kaketshir kati ragging asüba ken o benoka liasü.

Iba kaketshiri NEHU Tura Campus nung Proctor, Dr. Gino Sangma dangi züluba shidi ka nung iba aonung atalokba indang osang tatongi shia lir.

Paisa iba mapa inyakerem merenshitsu aser temeten agütsütsü shia lir. NEHU-i iba ken o agizüker bushisüngdang ka tenzüko.

Nagaland nungi first-year Agri Business Management kaketshir ka Tura campus nung Arabella

boys’ hostel nung anenok. October 8 aonung senior students 6-i pa tashiyim agi mangsa kümdaksü aser tsüngsangdaksü.

Iba kaketshiri hostel proctor Dr Gino Sangma tsüngdang ken o benokba sülen tatalokba temai adok aser iba ajanga NEHU ketdangsürtemi internal investigation ka tenzüka liasü.

Ano, Shillong nungia tanga fact-finding team kati Tura campus, NEHU semdangogo saka parnok bushitetba osang memetetdaksü lir.

Iba tatalokba sülen kaketshiri Nagaland nung ‘Zero’ FIR ka benokba ajanga police-i bushisüngdang tenzüko.

NEHU Vice Chancellor-i kaketshir kinunger den bushitetba osang lemsateptsü memulungaka NEHU-i formal FIR ka benoka liasü. Iba ajanga Naga Students Union Shillong-i NEHU inyakyim nung ashishitep.

NEHU ketdangsürtemi aibelenertem merenshitsu melena kümzüka ayutsü meranger ta NSUS-i temulung meleni bilemba metetdaksüogo.

PUJA SODI AGIR

Tir Yimiyim nung inyakerem rongnung tsümartem dena lir asünung, October 23, 2023 nü Durga Puja sodi agir anungji October 24, 2023 nü Tir Yimiyim osangkaket madoktsü.

-Yimozülur

Nagaland Angh-i Durga Puja nüngtem nung puja pandals semdang



Dimapur, Mongputeni/Oct. 22 (TYO): Durga Puja nüngtem nung Nagaland Angh La Ganesan-i October 22, 2023 nü Dimapur aser Kohima nung temple aser Durga Puja pandals tem semdanga liasü.

Iba mapang Angh-i Dimapur

kübok Sitla Mata temple, Near Railway station aser Rajbari Durga Puja Committee, PWD Durga Puja Committee nung sarasademba sülen kasa anogo ano Kohima Bazar Durga Puja Committee, opposite Head Post office, Kohima semdanga liasü.

Pai iba mapang parnok den salem lemsatep aser bendanga agütsür iba benjongmung meraketa amungtsü nükjidong nung mapa inyakba atema pelaba lemsatepa liasü. Pai ano October 23, 2023 nüa Kohima nung mandir kar semdangtsü sentong lir.

Illegal immigrant atema ajem-ajema meliteter: CM Biren Singh

Imphal, Mongputeni/Oct. 22 (Agencies): Myanmar nungi ozüing alema aruba illegal migration ken o nung state sorkar ajem-ajema melitetsü, ta Manipur chief minister N Biren Singh-i ashi.

"Iba ama illegal migration tebilemtsü tulu yur state sorkar ola madoki melitetsü," ta Manipur chief minister-i ashi.

Lokti tentet aikati Moreh nung state sepai

melidaktsüner, kechiaser parnoki linüki Myanmar nunger aika anir arur, ta pai ashi.

Deobarnep Moreh nung Manipur police temi Myanmar nunger asem apuba dak sendakba nung jembidang pai iba o ya ashi.

"Tawa lendong atalokba mapang mi agi rongdoker aliba ki nungi par asemi osettsüset aser electric generator tem

auya südi ta temolung melëmi lir," ta CM Biren Singh-i ashi.

"Moreh jila nung state police aser commando tem yokba anema lokti tentet kari tai pua longkak aitba ajanga iba amala ya ataloker," ta pai ashi.

Myanmar nunger nisung asem pua aliba ya Khamkhenthang Guite (25), Aung Mae (30) aser Aung Aung (25) ta jangjaogo.

Jorhat nungi Anamika Borah-i Dabur Gulabari Miss Assam 2023 kokogo



Guwahati nung October 20, 2023 nü Dabur Gulabari Miss Assam 2023 tetoktepba alidang tangokba noksa ka nung takok angur aser iba sentong ketdangsurtem angur.

Guwahati, Mongputeni/Oct. 22 (Agencies): Guwahati nung aliba Ambiance Banquet nung October 20, 2023 nü Dabur Gulabari Miss Assam 2023 tetoktepba alidang DCB Girl's College nung Zoology 5th Semester azünger arishi küm 21 tain Anamika Borah-i takok korang ajangteta liasü.

University of Manchester, United Kingdom nung Innovation Management and Entrepreneurship nung Master degree azünger arishi küm 24 tain Rhea Borah-i 1st Runners Up aser Gauhati Commerce College nung B.Com 5th Semester azünger arishi küm 21 tain Bhiolina Boro-i 2nd

Runners-Up den Miss Talent sub-title ngua liasü.

Iba tetoktepba sentong nung tetendangertem ya Brazilian Supermodel Cristiane Rodrigues; Reigning Miss Northeast 2022 & Femina Miss India Meghalaya 2023, Irene Dkhar; Founder and Creative Director, Wing Model Management Delhi; Nilaiwung aser Actor & Theatre Personality of Assam, Kopil Bora nungertem liasü.

Iba sentong lenir ya Assamese Actor Udayan Duarah liasü aser Show Curator, Creative Director, Choreographer aser Mentor ya Nagaland nungi Supermodel

asir Mister International India 2012, Opangtongdang Jamir liasü.

Miss Assam 2023 aser 1st Runner-Up yagi Assam state tenüing nung Miss Northeast 2023 nung tokteptsü, koba Sikkim nung November 5, 2023 nü agitsü, ta Director & Founder of Miss Assam, Shyamaga Kashyap aser Co-Director Akumnaro Imsong (Former Miss Nagaland, Miss Mokochung & Mega Miss Northeast) ajanga ashi.

Miss Assam 2023 tetoktepba sentong nung Official Photographer ya Jeremy Huhnar aser Videographer Anthony liasü.

Temelaba makai senotsü sarurtem merenshitsu: NSCN/GPRN

Dimapur, Mongputeni/Oct. 22 (TYO): Ministry ketdangsur tenüing nung nisung kari Dimapur aser Chümoukedima telungzük aser temeket nung shishilembartem dang senotsü meshiba osang Ministry of Kilo Affairs, NSCN/GPRN ajanga angazüka lir, ta MIP, NSCN/GPRN sangdong ka ajanga ashi.

Ministry aser NSCN/GPRN indang tenüing menükja iba ama ozüing alema tim masüba mapa inyakba tatok magütsütsü aser

temelaba makai senotsü sarur nem temerenshi tulu agütsütsü, ta sangdong ajanga ashi.

Ministry mesüra ketdangsur temi shinga danga kija, telok mesüra business dang senotsü meshitsü temelaba magütsür mesüra mapa menungloksür ta ajaki meteta alitsüla.

Anungji Kilo Affairs tenüing nung senotsü dak sendakba nisung shinga magizüktsü metetdaksür, ta sangdong ajanga ashi.

Assam Rifles temi sentong balala ayongzuka agi



Dimapur, Mongputeni/Oct. 22 (TYO): Assam Rifles temi Kohima district kübok Chakhabama nung October 22, 2023 nü Security Meeting ka ayongzükba nung Kezocha Range aser Kikruma Area nung yimtsüing 11 nungi VCC, VDB Secretary, GBs aser lanurtem densema nisung 76 dena liasü.

Item tesem nung tensa asadangtsü asoshi jembishinütsü atema iba senden ya ayongzuka liasü. Iba senden nung Security Forces aser nüburtem tsüingta tangatetep aser tesendaktep tajung nung alitsü atema ken o balala jembia liasü.

Region nung security tsütsü timtem ajurutsü ama ajitetba aser Assam Rifles temi region nung yimjung asoshi maparen balala inyakba indang parnoki jembi.

Kasa mapang Armed Forces nung nübu shimba aser mapa inyaktsü maongka adoka aliba aser MCA project inyaka aliba indang osang agüja liasü. Assam Rifles temi mapa

tajung inyakba asoshi nüburtem pelaba lemsatep aser Security Forces den tesendaktep tajung alitsü molunga aliba lemsatepa liasü.

Iba senden tembanga lokti chiyongba mapang agia liasü.

Maneni Assam Rifles temi Peren district kübok Tening nung October 22, 2023 nü "A Day with Company Commander" sentong ka ayongzuka liasü.

Lanurtem molungjang nung linük meimba molungsenttsü aitaaktsütsü ajungmesoa aser kaketshirtem temesepba mozü nungi pila alitsü indang jembia liasü.

Iba mapang kaketshirtemi Assam Rifles nungi tasü tait tetsür aser teburtem den sensaksema otsü tajung anga liasü.

Iba sentong nung drawing competition agia liasü.

Kaketshir temi shilem agiba atema Company Commander-i pelaba lemsatepa liasü, kong school asem nungi kaketshir 58 aser staff tem dena liasü.

NEPEX 2023 atema video conference senden thinener

Dimapur, Mongputeni/October 22 (TYO): Nagaland State Disaster Management Authority (NSDMA), Home Department-i sangdong ka ajanga, Nagaland Emergency Preparedness Exercise (NEPEX) Video Conference Coordination senden October 27 nüi thinenba metetdaksüogo. Iba senden ya October 20 nü agitsü liasü.

Senden nung shilem agitsü atema link ya sentong metenzük tsüingda mapangtong nung yoktsü. Iba sentong nung Disaster Management/District Disaster Management

Authorities/NDRF/CAPFs/Army/IAF, AHoDs/HoDs/Nodal Officers temi link koba agütsütsü ali iba ajanga Video Conference nung shilem agitsü asoshi mepeshia metetdaksüogo.

Kasa mapang nung Nagaland Emergency Preparedness Exercise (NEPEX) sentong tem kübok October 31 nü ATI (Kohima) nung Table Top Exercise aser November 2 nü State Mega Mock exercise agitsü aliba ya memelenshi-i mezüing sangdongba ama agitsü, ta kasa sangdong ajanga metetdaksü.

India-i Palestine nunger dangi mozü densema teyari oset aika yok



October 22, 2023 nü Ghaziabad nung aliba Hindon airbase station nung Indian Air Force (IAF) indang C-17 tayimtsü nung Palestine nunger nem agütsütsü atema mozü aser nüngdakba oset balala oshiketba mapang tangokba noksa nung angur.

New Delhi, Mongputeni/October 22 (Agencies):

Israel aser Hamas na tsüingda raraba mapang India-i Gaza Strip nung aliba Palestine nungertem dangi mozü densema teyari oset balala aika yokogo, ta Ministry of External Affairs (MEA)-i sangdong ka nung metetdaksü.

Amongnü Ghaziabad nung aliba Hindon airbase station nungi Indian Air Force (IAF) indang C-17 tayimtsü nungji mozü aser nüngdakba oset balala bener apusoa ao.

Tang Israel o Hamas telok na tsüingda raraba ajanga Gaza

nung Palestine nunger aika kanga timtemdar.

MEA otongdar, Arindam Bagchi-i, IAF tayimtsüji Egypt nung aliba El-Arish airport nung anenzüktsü, ta metetdaksü.

"India-i Palestine nungertem dangi teyari yoker. IAF C-17 tayimtsü nung Palestine nunger atema mozü touzük ton 6.5 den tanga teyari oset ton 32 bener Egypt nung aliba El-Arish airport-i apusoa ogo. Osettem rongnung taküm kümzükba mozü balala, surgery agidang amshiba osettem, sükitem, sleeping bags, tarpaulins,

merükmejuba osettem aser tzü merüktetba tablets densema lir," ta MEA otongdarisa metetdaksü.

October 20 nü Ato kilonser Narendra Modi-i phone ajanga Palestine Tir, Mahmoud Abbas den jembidang Gaza Strip nung aliba Al Ahli Hospital nung civilian aika asüba atema pa den mangyim jashi lemsatepa liasü.

Modi-isa pa dang India-i Palestine nunger nem teyari maneni agütsütsü, ta ashi.

Iba mapang nungji Palestine Tir, Mahmoud Abbas-ia Modi den tensa osang lemsatepa liasü.

Taruba küm 25 tsüingda India-i sensak tia samatsütsü: PM Modi

New Delhi, October 22 (Agencies): Ato kilonser Narendra Modi-i linük nürburtem dang sensakertem aser tekübok jenjang nung alirtem teka nung amer sensak tia nungi parnok aniteta linük yangerba nung shilem agitsü ayongzük.

Honibarnü Gwalior nung aliba Scindia School tentetba sülen küm 125 ajungba anogomong sentong nung jembidang Modi-i, India-i sensak tia samatsütsü aser temsüia alir ajak scheme balala ajanga tajangzük ngudaksüba ajanga linük renlokdaksütsü, ta ashi.

"Linük nung tekübok jenjang nung alir ajaki welfare schemes ajanga tajangzük mangu tashi sorkari maneni inyaksü; item rongnung Ayushman Bharat card, sorochocka gas connection, bank account aser

pukka ki densema lir," ta pai ashi.

Paisa, item welfare schemes ajanga sorkari sensaker crore 13.5 jungnüa kanga sensak tia nungi anitetogo, ta metetdaksü.

"India-i sensak tia samatsütsü aser terenlok mapa tulu inyaksü nükjidong yur inyaker. Tebilemba aser nükjidong napronglaji tongtibang südaksütsü; Nenok tebilembaji kü nükjidong lir," ta Ato kilonserisa metetdaksü.

Mapang tatsüka atema dang tajangzük angutsü dang nungibo tarutsü putu aika ajungtsü atema rangloker inyaksüji tongtibang, ta shia Modi-i Centre nung BJP-i aniba sorkari mapang talangka atema telemtetbatem agiba metetdaksü.

Sorkari agiba tongtibang telemtetbatem rongnung Arrla

370 agienba, GST mapatong benokba, One Rank One Pension scheme, Triple Talaq nokdangba aser Women's Reservation Bill agizükba densema lir, ta pai ashi.

Modi-i, item ama onüktem mebenetba ajanga tarutsü putu nung nürburtem kanga khuret südaksütsü liasü, ta metetdaksü.

Modi-i kaketshirtem dang, taruba küm 25 tsüingda India ya terenlok linük ka akümsü atema pai lanurtem dak tamang akar, anungji pei sasa pei dak tamang katettsüla, ta ashi.

Taruba küm 25 ya kaketshirtem aser India atema kanga tongtibang kümtem asütsü, ta shia pai

Scindia School nung kaketshirtem dang India renlokba nung shilem agitsü ayongzük.



October 22, 2023 nü New Delhi nung Delhi Chief Minister Arvind Kejriwal aser Delhi Education & PWD Minister Atishi Singh nati Sarai Kale Khan nung three-lane flyover semzüksüdag tangokba noksa nung angur.

Joko Asükuwa Arurji
Mokozü madokba Mi
Mi awangtsü & Shi Akongtsü
Barbeque Yanglua Chiteptsüba Mapang

Tatsüktiba Mijang
(Hottest Bamboo Charcoal)

ITEM NUNG YA ANGÜTSÜ

One Roof, Khermahal | Kitchen Queen, near City Clock Tower
 | Nagaland Decorative House, near Nagarjan Junction | Grab & Go, Supply -PWD- Duncan Junction | Kitchen Needs, DC Court Junction

Distributor | +91-9436001045
 Distributor | +91-9612612302

+91-9436002285 | +91-8787584752
 www.nagalandbambooindustry.com
 nagalandbambooindustry@gmail.com

DIMAPUR
KOHIMA
MOKOKCHUNG

Tang tashi Middle East tensa junga mejangjar: Dr. S Jaishankar

New Delhi, Mongputeni/October 22 (Agencies):

Tang Israel aser Hamas telok na tsüingda raraba aser Ukraine nunga raraba dak sendakba nung Amongnü External Affairs Minister, S Jaishankar-i, tang alima nung tensa tamajungba akümba tongti kuliji item rara ajanga lir, aser item rara ajanga region nung tensa melenshiba angur, ta ashi.

Paisa, tang Middle East nung tensa ya jungabo mejangjar, ta ashi.

Mapang talangka nungi kiralongra ya linüktem indang hadir ka amai lir, ta pai ashi.

Kautilya Economic Conclave nung jembidang Jaishankar-i, "Joko lendongji meta talang nung mali. Iba dak sendakba tongti kaji rongsenkettzüng lir, ajisüaka alia oa inyakba aser kiralongra ajanga bener arutsüba lendongji asadangtetsü makok," ta pai ashi.

"Küm 20 mesüra küm 50 tejaklen den medemdangra tanü India jenjang ya taoba mapang dang nungi tajungba, ta ashitsüsa kuli aika lir. Kechiyong tebilemstütem bentet shia tebilemstü tasen aika adoker. Asenoki maneni timtem bushia asadanger aser tebilemstü akar," ta pai ashi.

India nungi Canada nunger ketdangser 41 meyipa aoba dak sendakba nung Jaishankar-i, India-i Canada-i inyakba ama inyakba ajanga par ketdangser 41 aotsüsa aküm, kechiyong Canada nunger ketdangsertemi linük inyakyim nung maneni jangjongba ajanga India-i

tebilemstü kaa liasü, ta metetdaksü.

Paisa, "Iba ya linük ka nung ketdangser kwi yuja lir aser tanga linük nungjia ketdangser kwi lir, ta kasa asadangba onük ka lir. Vienna Convention ajanga kasa ketdangser ayutsü shia lir," ta ashi.

"Ajisüaka Canada nunger ketdangsertemi linük inyakyim nung tali jangjungba agi onoki iba telemtetba ya agitsüsa aküm. Onoki ibaji yimjak nungbo mesangdong," ta pai ashi.

Canada nung Justin Trudeau-i aniba sorkari, parnoki ketdangser 41 India nungi anir aruogo, ta sangdongba sülen linük ana tsüingda tesendaktep ano tamajungba kümogo.

India-i linük nung Canada nung ketdangser 62 aliba nungi 21 dang ayutsü tuyua liasü. Iba sülen Trudeau-i, iba ya ajanga India-i Geneva Convention alema inyaker, ta aitsü.

India nung Canada nunger diplomatic missions kar shibangba sülen UK aser US state department napronglai India dang 1961 Vienna Convention on Diplomatic Relations nung aliba ama inyaksü ajungshiogo.

Taküm June 18 nü British Columbia kübok Surrey nung aliba Sikh cultural centre kima nisung anati Khalistani lenir, Hardeep Singh Nijjar khaseta liasü. Tawa Canada Ato kilonser Justin Trudeau-i, Nijjar khaseta nung India-i shilem agia lir, ta tai tongloksüba sülen nungi Canada aser India na tsüingda tesendaktep tamajungba akümer.



TIR YIMYIM YIMOBILEM (EDITORIAL)

DIMAPUR TENTONÜ, MONGPUTENI (OCTOBER) 23, 2023

NPF koma aotsü ?

Nagaland nung Naga yimten telok, regional party, rongnung tenüng dang melen ashi nükjidong aser telok tamaitü noksa memelen aruba telokji Naga People's Front (NPF) ya lir. Aji oda, akhidang United Democratic Front (UDF) nungi Naga National Democratic Party (NNDP) aser Naga People's Council (NPC) ta asüba telok nungi 2002 küm, kechikomakaser, Congress telok nung adener kar den NPC nung adenertembo ajak dener telok ka kuma longjemer Naga People's Front (NPF) ya kumtet. Iba jagiang Nagaland nung Congress teloki yimsüsüa aliba atsüngdoker telok tasenba NPF teloki government kümer 2018 küm tashi yimsüsüa aruogo. Atangji, 2002 küm Congress telok nungi tang Nagaland Chief minister inyaka alisang, Neiphiu Rio aser taoba Nagaland Chaplee kilonser K.Therie nati anir Shürhozelie-i aniba NPC den meloktep asübo tang ya NPC agi NPF akümba otsü ya kenyongi balaka kümer lila. Taoba küm 20 jakdangbo Nagaland nung nisung ajak amato Congress purtem dang liasü, anungji NPC telok ya Naga nunger asoshi tashipangtsü telok amai azüngazünger kumadok. Iba ama mapang ka nunga Nagaland nung aliba Naga nunger yimten telok, Naga regional party, medoktsüi pa kisüng süaka mitsa maitsüi nokdaksangji Shürhozelie liasü. Atangji, kija süaka pei kimung aser pei mitsa maitsüi nokdakba nungji ochi dena liasü südi, tangartemiang pa bushia arua NPC agi NPF melener kasa telok tamaitü antepong amshia tang tashi akangkanga nokdaka lir. Atangji, NPF akümbaji Shürhozelie tashi agi masü saka Neiphiu Rio tashi agi aküm, saka tang tashi nung Neiphiu Rio dangbo Shürhozelie-ang maongka tajungba angu amai bilemer, kechiyong pa kisüngi ponger aruba telok mesamai takangba aküm aser paa chief minister inyaktsüsa meimlai ka mapangi bentsür aru. Ibaji serbo parnok rongnung temulung ka mekumtet Neiphiu Rio-i pai akümba NPF telok toktsür ao aser ano telok tasen ka tenüng Nagaland Democratic Progressive Party (NDPP) tentet aser tanü tashi pa iba telok nungi chief minister kümer yimsü asür. Atangji, 2023 election matongdang küm ishika jakdang NPF aser NDPP na longjemtsü amai ken o aika temai adoka jembiba angashiogo. Ajisüaka, NPF nung tir Shürhozelei den hai haura kaa mejembitetba ajanga melongjemtet 2023 election-bo Nagaland nung 'regional party' ana NPF aser NDPP na telok balala ser toktepogo. Atangji, NDPP o BJP telok na kulem ser toktep asünungji, parnok tashiji metizüktet, Congress telok nungibo kata madok saka NPF telok nungibo lenir tajung ana adoka lir. Tena jagi tatar senden nunga ter shia jembir. Ajisüaka, NPF dak tashi mait kaji MLA ana danga asüyonga nübortem ajangzükdaksütsü mechi opposition aküm nungbo ajungtsüba ser nung NDPP aser BJP nati aniba government nung adenba agi yar a mereprangshi aser sotsüa meyongshi tom nung kanga timtema angur. Iba ama mapang ka nung NPF tir Shürhozelie, joko tambur kümer, NPF tir menden toktsüogo aser pa melen Apong Pongener shimteta lir. Aji oda, NPF tir melenshiba ajanga taruba küm tashi nungbo temelenshi kabo ataloktsü amai bilemer, kechiyong NPF nung Shürhozelie malibaji Rio atema NPF den jembitsü temelaba akümer aser NPF nung alirtem atema NDPP purtem den jembitsü lenmang tesadamba asütsü. Iba ama mapang ka nung center nung Congress teloki kanga anakshitsüba agi state election aika nung Congress-ang tajungba arutsü amai repringteper, anungji Nagaland nunga tang Tapi Assembly constituency bye election nung meimlaika Congress telok o NDPP telok na kasasa kuma toktepdagi. Iba ama yimten mopong yagi NPF o NDPP na yakta ajurutepa meimteptsüsa akümtsüa akok.

OLEMSABANG

Anemsü agi asangba dang nungibo ochishia arrtsüba tajungba

~ L. Kika Pongener.

(Yashi adok nungi...)

Asenok nisunger yimya agi, loktiliba nung ken o jembidang, ken o attsütep dang, mesüra ken o telemtetba (Decision) agidang, ken o temela nungbo, züngsem ajunga raktepa nokdaka, pei pei tebilemba/tangatetba jembitsü... Saka ken o tasak/temerang, nungsen-nungmen agitsüla ken o nungbo, nokdaker pei tebilemba/tangatetba tasüita jembir kata malir. Aji oda, loktibo ajungtsü, saka pei-bo nungsen-mer agitsübaji kanga tanang/jangratemtsübo masü. Ajisuaka, lokti ajungtsü asoshi nisung kari nungsen-mer arema tasüita ochi o mejembira, kodaser lokti ka tejakleni aotsü...??? Terasatsüka, tanü asen lokti nung lennir aikati nungsen-mer tsübuba agi ochi o bendang magütsüteter, ochi nung ken o malangdangtetba agi asen lokti shiranger. Atangji, lennir-i pei tata shilem mapa makokba agi lokti aika yareta shirangdaktsür. Aji oda, nungsen-mer agia ochi jembitsüba ya nisung aikatibo memulonger, kechiyong shirnoki nungsen arema tasüita ochi nung nokdaker, parnokji pa/la kija tuteta (Single out) tetla-tetshir. Terasatsüka, lennir nungi tenzüker nübur aikati temetongshiba maginur. Tsüngrem o-i ashir, "Shibai temetongshitsüba magizüker, pai pei tanela sempar. Saka shibai tarrutsüba dang angar, pai tangatetba ajangzüker" (A.Shin-15:32). Atangji, asen lima aser lokti ajungtsü asoshi, asenoki temetongshitsüba aser tarrutsüba pelaseta agizükdi.

Asenoki tanü asen lima nung yimden, arogo, mungdang aser loktiliba ajunga repringdanga ora, manganütsü mali, teimba ka nung rongsen ketdangsuba ochimashi agi sunga lir. Lokti nung lennir aikati, lokti meyong rongsen pei meyong kümer agitsü arishia inyakdang, tanü asen loktiliba aika nung mangatettep adoker aser mepetmesü agi sunga lir. Tatishitsü agi...lokti sentong kar atema tenla-tenji/saru-saji kar sarura, ketdangser shir sudir suaka, parnoki nütsüng-nübur temulong asütsüsa, kwika sarutet (?)...Iba sarutetbaji tejangja 'List & Figure' nübur dang sayutetra, ibajagi ochi mapa sayur. Ano Jila/yimtsüng terenlok mapa atema senotsü kar arua inyakra, "Kechi mapa nungdem nung sen kwika aru (?)...Ibaji tejangja nübur dang shitettsüla. Ajisuaka, ketdangsertem jagi ochishia/shitak inyaka liaka, nübur dang sen kwika aru, ibaji tejangja (Figure) mesayutetra/meshitetra...Iba nungji nübur-i temulong malemstsüsa mapa jagi sayur. Aji oda, tanü asen lima nung loktiliba inyakyim aika nung, nüburtemi ashishitsüsa inyakba angudang kanga sasa-a bilemer. Anungji koba lokti nung sudir suaka, kechi mapa inyakdir, nüburi temulong asütsüsa/agizüktettsüsa ochishia inyaktsüla. Aji oda, ochimashi inyakba jakdak-jakdaka nguaka, yabo taia...ta indangindanga meshitet, ano meyiper anemsü agi tenungsang agütsütepba, ibala yimya yabo melenshidi. Atangji, asen lima, yimden, arogo, mungdang, aser loktiliba ajungtsü asoshi, nisung kari nungsen arema odi-odia/indang-indanga yimjak nung arrtsüa memetongshitsüra, asen lima kodanga majungtsü aser merenloktsü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

CBCMHK nung anogo asemnü Fathers Camp takok ngua tembangogo



Viswema (Kohima), October 22 (TYO): Chakhesang Baptist Church Ministers Hill, Kohima (CBCMHK) nung anogo asemnü Fathers Camp agia aruba sülen Amongnü tembangogo; iba sentong ya John Govt Higher Secondary School, Hostel, Viswema, Kohima district nung agi.

Amongnü sentong pezübuba nung tongti o jembir CBCMHK Associate Pastor, Thujoneyi Veswu-i "Ni aser ozü kibongibo Kibuba dang tenzüksü" (Luk: 24:14) onük jembia liasü.

"Tsüngremi tebutem nem khuret tulu agüja lir, anungji tebutemi kanga kümdangtsüla aser taküm ali tashi tajungtiba agi kibong anepalutsüla," ta pai ashi.

"Tebu kati par kibong tekümtet lenmang nung manitetra atangji Tsüngremi azü tokshiba jenjang asüngdangtsü,"

ta pai ashi.

"Alima rongsen arishiba ajanga Khrista nungi pilar aser tekümtet lenmang samar, anungji alima rongsen marishitsü saka Tsüngrem dak dang amangtsüla; ibaji ajanga nai nüngdakba ajak nü nem meküploktsütsü," ta Veswu-i ashi.

Yihusua-i "Ni aser ozü kibongibo Kibuba dang tenzüksü" ta jembiba lephsia pai, nisung aikati Tsüngrem dang nungi pilayonga Yihusuaibo ajangajanga nokdak, anungji tebutemi Yihusua ama alitsüla, ta ashi.

Session II nung shisalen sayur Dr. Vinotsole Hies-i "Importance of healthcare" onük jembidang pai, temang anema alitsü atema mapang shia check-up agitsüji tongtibang, ta ashi.

"Temang tashi itta alitsü

atema mapang shia exercise agitsüla; exercise agiba ajanga arrshi-a atsülanger," ta paisa metetdaksü.

"Tanü-asüng nisung asüba kulitem reprangdangra yi ajemba aser moko achiba agi asürtem aika lir," ta shia lai tebutem dang moko machitsü aser yi majemtsü saka loktiliba atema tagidak akaba tebu kaka asütsü ayongzük.

Dr. Vinotsole Hiese leniba nung lar team-i angati check-up agitsü aser mozü-a angati agütsü.

Anogo asemnü camp nung nisung ajak senteper 170 aden, ta Camp Media Coordinator, Kuzhovesa Soho-i sangdong ka ajanga metetdaksü.

Iba camp nung tebutemi telemtetba agiba nung ajemdaker kobi melii Arogoi baptism classes agiba sülen baptitsütsü tebilemba lir.

Tang UK nung tekeratiba ainba Arogoji China nung Arogo lir

October 22, 2023: Tang United Kingdom nung kanga tekeratiba ainba Arogoji China nung Arogo lir, ta Bible Society-i metetdaksü.

Tesüiba küm ana tsüngda UK nung aliba China nung Arogo nung nütsüng shilem 28.8 bendenlokogo. Kasa mapang nungji UK nung Pentecostal Arogo nung nütsüng shilem 3.3 dang ain aser minority ethnic churches nung nütsüng shilem 1.8 dang ain.

2021 küm UK nung aliba China nung Arogo 138 nung China nung Khristan 83,072 liasü saka tanübo Arogo 201 nung China nung Khristan 114,976 lir, ta kasa osang ajanga metetdaksü.

UK nung China nung Khristanem nütsüng renlokba talisa Cantonese oshi jembir China nung ajanga lir.

Dr. Yinxuan Huang-i Bible Society atema iba research ya agia liasü.

Dr. Yinxuan Huang-i, "2011 küm nungi 2021 küm tashi nung asadanga iba ya terben agi tali renlokba lir," ta ashi.

"China nung Khristanem nütsüng ainba tongti kuliji Home Office's BNO (British Nationals Overseas) visa scheme ajanga asütsüla akok ta ni bilemer; iba visa scheme ajanga 2021 küm nungi tenzüka Hong Kong nungi China nung

150,000 shi UK nung alitsü atema aruogo," ta pai metetdaksü.

"Arogo temi nisungtem anir arutetba kulitemji, Arogoi tanela chiyungtsü agütsüba den külemi anogo shia nisungtem anepaluba agi asütsüla akok ta ni bilemer. Arogoi loktiliba atema inyakbaji yagi (UK) arur tasenpurtemi sapur. Bendanger kati temeim aser anepalu angutsü atema tesemji ya (Arogo) dang lir ta ni bilemer. Arogoi inyakba mapa tajung parnoki lemsatepba ajanga tangartem-a anir arusemer. Tatemsabo nisung aika nem tamang indang angatetdaksür aser teti atema taküm melenshir," ta pai ashi.

Dr. Huang ya taoba mapang London School of Theology nung zünga liasü.

"Tang mapang ya UK nung China nung Arogo atema tongtibang mapang ka lir. Iba Arogo kanga indar. Iba ya mission inyaksü atema-a maangka lir, kechiyong Arogoi China nung aika atsüer aruteter," ta pai ashi.

"Iba mapang ya English oshi jembiba Arogo temi Hong Kong nungi arurtem parnok Arogoi tekülem sentong nung adentsü atema jaoktsü asoshi maangka aliba mapang ka lir. Iba ya Arogo aintsü maangka aliba mapang aser kati ka dang nungi angazüktsü mapang lir," ta pai

ashi.

Kasa report ajanga ashiba agi, China nung Khristan ajakibo China nung Arogo nung madener, kechiyong China nung Khristan shilem 25-ibo English oshi agi tekülem sentong agiba Arogo nung adener.

UK nung aliba China nung Arogo nung rongnung kanga tekeratiba ainba Arogoji Manchester Alliance Centre lir; iba Arogo nung züngsem troben agi tali inlokogo.

Manchester Alliance Centre nung pastor, Rev. Wai Chor Chiu-i, "UK sorkari Hong Kong nungi arurtem pela agizükba mapangji jangratemtsüka liasü. Iba Arogo nung züngsem troben agi teimba kümogo. Mezüngbo iba Arogo nung züngsem 1,500 dang liasü," ta metetdaksü.

2020 küm UK sorkari Hong Kong nungi British National Overseas citizens aser parnok kibongtem UK-i arua küm pongu tashi alitsü atema visa agüja liasü. Iba sülen parnoki UK nung teti alitsü atema temepishiba agütsüteter aser temsüa dang lira British sensa-a agütsü.

China sorkari Hong Kong nung National Security Law tasen benokba sülen Hong Kong nung alirtem aika UK-i oa jenoka lir.

ANOGO ABEN TSÜNGREM DEN

Kotak asoshi asüngdangba

Kodang asenoki sarasadema ashir "Kotak nung koda lir alima nung aji oda ne mulung süang" Luke 11: 2.

Kodang "Kü mulung ta shidir" paradise samar. Nisungi mulungba kodang Tsüngremi mulungba den tsüktepdir timtem adoker.

Kari ashir, "Alimaji ken atenba kongki ka mesük, kentener shiai pai mulungba ken atentsü. Tanishiri ashiba mangai pei sünütsü dang süa tenra, idakji ola alitsü saka kenbo madoktsü. Ken adokdaksünera ken teneri tesayuri aniba nung anidaktsüla.

Kodang Yisui asenok, 'Ne mulung süang' ta sarasademtsü sayu, Pai senti rongsen ajak agutsütsü mesüra endoktsü masüngdang. Saka aseni asen alidak kinükji koda sangwatsütet iba indang asüngdang. "Ne mulung süang" ta sarasademba tetezü, Kotak asoshi asüngdangba. Ibai Tsüngrem dang meputepi aliba ajak putepa lidakjang ta asüngdangba lir. Alima ola nung temulung magütsüi, Tsüngrem ola nung temulung agütsüdakjang ta mepishiba. "Kotak nung koda lir alima nung aji oda nü mulung süang". Kotakji tepela angudak kechiaser idakji Tsüngremi mulungba teti inyaker. Idakji Tsüngremi anishir aser Kotaker telok ajungai Pai anishiba ama atener.

Yisu Yimya

"Nisungi kecha südanga Tsüngrem tenük agi mangu. Saka Yisubo yamaji masü!"

Pa asenok rongnung ka aküm, aser pai asen nüngdak ajak meteta lir. Yisu timatempa aser asüba nung asenok pa den ka akümtsü tasak masü. Saka kodang aseni pai tasüba madak takok anguba shisadangdir Pa asenok ama masü. Pa Tsüngrem lir! Pa dak Taküm aser tasü madak tashi lir. Aser iba tashi jagi Yisuji Tsüngrem ta jungkai adoktsü!

Anungji asen Taküm nung Yisu aser Pa tenzüka tetezüji kechi? Ibai asen taküm, jakla aser tia den apet asü masü? Atangji Yisu mapaji tekümtet mapa asü masü?

Yisu mapa aser taküm tanü asenok mapang den tapet asü masü? Pai asenok dang Tsüngrem aser pa dangi arutsüba apuji sayur. Pa mapaji Tebu Tsüngremi asenok asoshi teti tekumtet agütsüba mapa lir. Pa mapa ajanga asenoki Tsüngremi pa temeim asenok dang sayuba, alangzükba, aser taküm sotba metetter. Saka Tsüngrem tenüng sangdi, pa Tsüngrem ama masü, nisung rongnung ka lir.

Old Showuba Ao Baptist fellowship nung holistic seminar agi



Dimapur, Mongpuateni/ October 22 (TYO): October 20 nungi tenzüka October 22 tashi ABAM WM sisterly care ministry ajanga Sungkomen Baptist Arogo-i Old Showuba Ao Baptist fellowship nung holistic seminar ka senotsü aika indoka (full sponsored) ayongzüka katsüogo, ta Old

Showuba Ao Baptist fellowship nung pastor, M. Yanger Ozüküm-i sangdong ka nung metetdaksü.

Iba seminar kanga temoatsü ngua agitetogo; Old Showuba Ao Baptist fellowship-i ABAM Women Separment aser Sungkomen Baptist Arogo dang kanga pelar, ta kasa sangdong ajanga metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Sariwar

(n) tongpangi aoer (warrior)

* Sariwari pei taküm mapayur.

Sarongsaji

(adj) lokti rongrong adokdaksütsüsa o mekümdangi jembiba (unruly)

* Lokti nung kanga sarongsaji asürtemi senchi menar.

OLONG PAITEP # 6674

1		2		3		4	5			
				6						7
		8								
9				10		11				
			12						13	
						14				
16										17

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S___i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatemangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6673 TELANGZÜBA

TIPIEN :

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among,
- 12. Miim, 13. Anem.

NAI-A YA METETTER MA



ICC MEN'S CRICKET WORLD CUP INDIA 2023

Teburtem ODI Cricket World Cup asaya ya taküm agi 4 ben buba India nung asayar asütsü, aji oda taoba küm asem 1987, 1996 aser 2011 nungbo tanga linük den külem ser ayonga asaya liasü. Saka taküm 2023 nungbo India linük kisüngi ayonga yimti balala 10 : Bengaluru, Hyderabad, Delhi, Mumbai, Kolkata, Ahmedabad, Dharamsala, Chennai, Pune aser Lucknow nung asayadgi.

Arunachal nung NSCN K-YA züngsem ka temai adok



Guwahati, October 22, 2023 (Agencies): Arunachal Pradesh kübok Tirap Police tsüngdang National Socialist Council of Nagaland (NSCN K-YA) züngsem ka temai adokogo.

Iba nisung ya Lieutenant Wanghong Nokpa ta jangjaogo aser pai OC PS Lazu SI L Kimsing aser 6th AR telok ka tsüngdang temai adok.

Nokpa-i 9mm pistol aser 3 rounds bener arua agütsü. Iba sülen pa District Police aser 6th Assam Rifles ajanga

Tirap Deputy Commissioner dangi anir oa surrender certificate ka agütsü.

1999 küm Barap Middle School nung Class 4 6 nung züngya lia NSCN(K) Capt. Kewang Diotsa-i pa den tanur 18 tashi tashiyim agi anir ao ta Nokpa-i ashi.

Idangji parnoki ita asem basic training agi aser private rank nung mapa inyaksü tenzük. NSCN(K) nung alidang pai timtem aika ajurua liasü ta paisa metetdaksü.

Tanga telungpurtemi pa nem timtem agütsü aser tesep

nung pa nem stipend khen danga magütsü. Iba jagi pai CHQ, Lahong nungi Myanmar kübok Ngaimong yimtsüng ajanger Lazu police station-i aru ta Nokpa-isa ashi.

Pa temai adoktsü aser par kibong anepalutsü atema temai adok ta paisa shisem.

National Socialist Council of Nagaland (NSCN K-YA) ya National Socialist Council of Nagaland (NSCN) nungi razüka aoba telok ka lir. NSCN K-YA-i NSCN aser Centre tsüngda yimjung olemtep nung madener.

Manipur ex-BJYM President-i police ket nung bendanga agütsü

Imphal, October 22, 2023 (Agencies): Manipur nung taoba Bharatiya Janata Yuva Morcha (BJYM) tir Manoharmayum Barish Sharma-i pa sasa police ket nung bendanga agütsüogo.

Nisung pungu dak injang khaloktsüba nung Manoharmayum dak tongti süa tai tonglokja lir.

Iba lendong ya October 14 aonung Khwairakpam Leikai Seg Road nung atalok. Iba dak sendakba nung police-i nisung pungu aser gari ka puogo.

Joint Action Committee (JAC)-i akhangba ama Manipur

Chief Minister N Biren Singh-i taoba BJYM lennir aputsü tetuyuba agütsüba sülen pai police ket nung bendanga agütsüogo.

"Chief Minister-i Manoharmayum Sharma aputsü aser nüngdakra warrant ka agütsütsü ta nangzük. Sorkari iba lendong nung yirua alir nisung pungu anepaluba nung yaritsü" ta JAC convenor Chongtham Iboyaima-i ashi.

October 14 aonung 10:30 ako meta mejangjaba nisung 20 shi kati Khaidem Seityajit (Bobo) aputsü merang saka tamakok angu.

Bobo kinungtsü Ranjana-i ashiba agi la kinungboi anogo ishika tejaklen Facebook nung post asü.

Iba post atema Manoharmayum Sharma den tejak meibangba nisung kar arua la kinungbo anir aotsü merang. Idangji parnok raratep aser nisungtem adenshi. Iba jagi parnok jena aodang injang kar khadokdang nisung pungu yiru ta Ranjana-isa ashi.

Iba temeket nung alirtemi JAC ka tentet aser prangpong bener ozüng alema inyakterem anema lungkak aitba sentong ka agia liasü.

Indian Army & BRO-i Sikkim nung Bailey apu yanglutsür



Guwahati, October 22, 2023 (Agencies): Indian Army nung Trishakti Corps sepaitem aser Border Roads Organisation (BRO)-i North Sikkim den sendakteptsü atema mapa tulu inyaka arur.

Parnoki civil administration aser iba temeket nung alirtem den külemi mapa balala inyaker.

BRO Mangan-Tung-Chungthang sendakteptsü meranger aser külen Trishakti Corps-i Mangan-Sanklang-Theng-Chungthang lenmang lapoktsü atema inyaker.

Iba atema Mangan-Sanklang crossing nung bailey apu ana tashi yanglutsüsa akümer. October 22, 2023 nü apu mezüngububa renemogo.

October 4 nungi North Sikkim nung Mangan den tesentaktep mali aküm. Iba ajanga Chungthang aser Sanklang-Mangan crossing nung foot bridges aser zip lines yanglu.

Mangan-Tung-Chungthang lenmang kanga mejungi raksaba ajanga Naga village adena lenmang tasen ka yanglur aser

iba atema apu tasen ka yangluba nung mapang agütsü.

Külen, Trishakti Corps-i Mangan-Sanklang-Theng-Chungthang adena Chungthang tashi lenmang lapoktsü meranger. Parnoki Mangan-Sanklang crossing nung bailey bridge ka yanglutsü tenzük.

Ajisüaka ayong nung tzü teimba ayimba ajanga apu balala ana yanglutsü telemtetba agiogo aser Trishakti Corps sepaitemi Deobarnü apu mezüngbuba renemogo. Tanabuba apuji October 27 nü renemtsü imlar.

Israel-i Damascus aser Aleppo airports nung ano amak: Syria

Damascus, Mongputeni/Oct. 22 (Agencies): Gaza nung tanen makai amakba mapang Israel-i Damascus aser Aleppo nung aliba airport nung ano maka hopta ana nung tanaben shibangtsüsa akum ta Syria state media ajanga ashir.

SANA state news agency ajanga Deobarnü ashiba agi, Israel mitkar tayimtsü amshia airport tongtipa ana nung amakdang Damascus airport nung civilian worker ka asü aser ka yiru.

senzüba anena atatsüsa akum aser nisung asü-amaba den osettsüset raksatsü saka October 7 nung Hamas teloki Israel litsü telung nung nisung 1,400 dak tema tepsetba sülen Israel-i iba Gaza nung tayimtsü amshia amakdang Syria nung iba tayimtsü anendak tesem ana nungya tanaben amaker alitsü.

Israel-i bomb pokloksüba mapang Gaza nung nisung 4,400 shi tepsetogo aser asürtem ya aika tetsür aser tanurtem lir ta ashir.

Hamas den rara tezüker mapang tatsüka tsungta Israel-i tayimtsü amshia Syria nung airport tuluba ana nungya maka liasü, kechiaser parnoki Syria nungia raratsü südi ta bilema liasü.

Mitkar indang osettsüset belentsü atema item airports ya Iran-i amshitsü akok aser itemji amshia amaktsü akok ta Israel-i tsübo ba bilemer, ta Ministry of Foreign Affairs ajanga ashir.

"Airport indang runways raksatsüba ajanga service magütsütettsüsa akum," ta mitkar sangdong ka ajanga shia liasü.

Tayimtsü tem rongnendak Latakia timti nung aliba airport bushia yoka liasü, ta Syrian Ministry of Transport ajanga sangdong ka nung ashi.

Taoba mapanga Israel nungeri tayimtsü amshia airport ana nungya tenük yoker maka liasü aser iba yongji tayimtsü

October 12 nüa mapang kasa nung airport anaprong nung tayimtsü amshia maka liasü.

Taoba hopta tatemlen Israel-i Aleppo amak. Iba mapanga airport nung service magütsüteti liasü aser nisung pongu yiru, ta rara asadanger temi ashi.

Ita tetenzüklen drone kati Syria kübok Homs province nung aliba military college ka amak aser iba mapang nisung 100 dak tema takum sama.

Israel-i Gaza nung civilian dak tenük yoker amakba anentsü memolungra region ajungalen onoki yariba 'resistance fighters' temi Israel amaktsü akok ta Iran-i aiben tekumdangtsü shia arur.

Israel-i Gaza amakba ajanga yangji nüburttem tajemtsü tzü, chiyongtsü, totzü aser mozü agi anünga kumogo.

Israel-i melaba sülen Egypt-i khen atema Rafah crossing lapoka humanitarian aid mezüngbuba shipment Honibarnü Gaza tongogo.

Israel-i tayimtsü amshia amakdang Gaza nung nisung 55 asü

Gaza City, Mongputeni/Oct. 22 (Agencies): Israel-i Honibar aonung tayimtsü amshia Gaza amakdang nisung 55 asü aser ki 30 raksatsü, ta tesem ajaklen sapanger aliba Gaza nung ketdangtsür temi ashi.

Honibar aonung amakdang nisung 55 dak tema asü, ta Hamas government press office ajanga ashi.

Ibai Israel-i Gaza nung bomb poklokja arudang civilian timba sür Palestine nung 4,300 dak tema tepseter aliba nung bendenloksü, ta Gaza indang Ministry of Health ajanga ashi.

October 7 nü linük telung nung Hamas-i amakdang civilian timba sür nisung 1,400 dak tema tepsetba sülen Israel-i iba telungpur telok ya samatsütsü nangzüka lir.

Israel-i tayimtsü amshia amakdang Gaza nung nisung aliba ki shilem 40 shi raksatsüogo mesüra

samatsüogo, ta United Nations ajanga ashir.

Israel-i Gaza nung aliba Palestine nung nisung million 1.1 dang south tsütsüi aotsü totuyuba agütsüogo aser parnoki iba tesem ya alilen nungia amaktsü renemshir.

Ajisüaka Israel-i tayimtsü amshia amakba nung Gaza southern tsütsüa kongshir, aser Honibar aonung Khan Younis nung nisung toku tepset ta Hamas ketdangtsür temi ashi.

Par sepaitem Gaza telungi aidang lendong ajemdaktsütsü mechi Israel mitkari aruya aliba anogotem tayimtsü amshia tesashiba amaktsü nangzüko.

Alilen nungi amaktsü imla aliba ajanga civilian tali asütsü tsübor, kechiaser nütsüng yongsük onsara aliba Gaza nungya nüburttem jenokdak tesem kanga ajema lir, koba 2006 küm nungi Israel nungeri mokdanga lir. Gaza nung nisung

million ka dak tema pei ki yutsür tesem balala nung jenoka lir ta UN-i asadanteta lir.

"Tanü nungi tenzüka onoki tayimtsü amshia amakba tali akumer aser lendong tajemba kumdaktsütsü," ta Israel mitkar indang odongtar Admiral Daniel Hagari-i Honibarnü ashi.

"Onoki tali amaktsü, anungji Gaza City nung alirtem dang pei takum kumzüksü asoshi south tsütsüi aotsü ayongzüker."

Israel sepaitemi alilen nungi amakdang timtem jenti ajurutsü imlar, kechiaser Gaza nungya Hamas booby traps aser longpok aika lir. Ano Hamas teloki nisung 200 shi pua aliba ya tebilemtsü lir.

"Gaza nung nütsüng yongsük onsara lir, anungji tsüngchir temi yangji terenemshiba jenti alitsü, saka onoka parnok asoshi renemshir," ta Israeli Lieutenant-General Herzi Halevi-i ashi.

Russia foreign minister Sergei Lavrov-i Iran semdangtsü



Moscow, Mongputeni/October 22 (Agencies): Russia Foreign Minister Sergei Lavrov-i Hombarnü Iran yimtiba Tehran semdanga Iran Foreign Minister den sensak asemtsü, ta ministry otongdar kati metetdaksü.

Iran indang official IRNA news agency-i taoba mapang Russia, Turkey, Azerbaijan aser Armenia nungi foreign minister tem sensaksem ka nung shilem

agütsü atema jaokogo, ta metetdaksü.

"Lavrov Hombarnü Tehran nung sensaksemtsü atema aotsüba osang jangjatsür," ta foreign ministry otongdar Maria Zakharova-i, TASS aser RIA news agency tem dang ashi.

Middle East nung mangatetep adoker aliba aser Armenia aser Azerbaijan na tsüngda ken o mebenyeti aliba

mapang ka nung tang iba sensaksem asoshi jaokogo. Taoba ita Azerbaijan-i Nagorno-Karabakh nung Armenia nung separatists tem amakba sülen mepetmesü tulu adoka liasü.

Kasa mapang nung taoba küm nungi Ukraine amak tenzüka sülen Russia-i Iran dang nungi military teyari meshia arudar, kechiyong linük anaprongla nem anüolen aliba linüktemi tenokdanga agütsür lir.

Anüolen aliba linüktemi, Russia-i Ukraine amakba mapang teyari agütsüba atema Tehran aitsüogo. Iran-i Russia nem drone aika aser tanga hadirtem agütsüogo ta shia parnok aija arudar.

Menungra Bilemteter

Asür Temsunup Jamir, Mopungchuket

TEMSUBA nai onok toktsür or tanü küm ana ajungba anogo na bilemteta menungra sarasadema amonger. Na kodanga onoki mamatsü, ne temeim mapatem teti bilemteter. Na tesünep nung yujanga ta onoki sarasadema amonger.

Temeim Tzürabur aser kinunger adiani ajaki salem no Temsüba.

SANGDONGER

Chuchuyimpang Mongoya Prayer Garden nung 27th to 29th October, 2023, anogo asem Healing Crusade sentong agütsü renema lir. Anungji nüburt shirnok shi aser Tanela nung taneptsü aginüa ali, temulunger ajak arua Tsüngremer temoatsü agütsü pelashishia jaoker.

Tongtepratepdak - 9856486841 / 8258802047

Mapang - Aonung : 5:00PM
Anepdang : 9:00 AM
Anüngdang : 12:00 Noon
Sunday Devotional : 10:00 AM

South China Sea nung Philippines aser China nung rong tsüktep



Manila, Mongputeni/October 22 (Agencies): South China Sea nung China aser Philippines nung rong anaben tashi tsüktepba sülen linük ana yagi kati ka dang tai tongloksütepogo. SCS nung linük ana tsüngda mangatetep adoker aliba mapang tang iba ya atalokogo.

Iba tatalokba ya Spratly Islands nung Second Thomas Shoal anasa ataloka liasü, kong Beijing-i iba tesemi mapang shia rongtem yoker, kechiyong parnoki tzüyim ajunga ya parnok meyong kümdaktsütsü meranga arudar.

China indang coastguard-i ashiba agi, parnok indang rong ka aser World War II-era transport ship kati supply bener oja aliba Philippine nung rong ka tsüktepa liasü. Shoal nung iba rong ya Philippines-i outpost ka ama amshia arudar.

Coastguard-i ashiba agi, parnoki temzüng ozüng kübok iba rara dang amshiba rong yagi ozüng alema osettsüt balala bener aotsü nokdanga mapang rong ana ya tsüktepa liasü.

Kasa mapang nung Manila-i, China indang rongi parnok rong nokdangtsü merangba ya lendong tulu aketba inyakyim ka liasü ta shia kanga mejungi aitsüogo.

Ano Philippine coastguard rong ka supply tem teti ama meiner oya aliba mapang China indang maritime militia vessel kati tsükoktsü, ta Manila indang

West Philippine Sea Task Force-i ashi.

Ajisüaka China-i ashiba agi, Philippines nung indang rong yagi China nung indang angopudang amshiba rong ka dak asa atsük.

Philippine military-i lemsatepba noksa ka nung China indang coastguard indang rong bow aser Philippine indang supply bener aliba rong na tsüktepba sayuogo. Rong ya raksa asü meraksa mejanga.

Ita ka ana tsüngda linük ana South China Sea kübok tesem balala nung mangatetep adoka aruogo aser talisa Spratly Islands kübok Second Thomas Shoal nung mangatetep adoka arudar.

August ita China indang Coast Guard rongtemi, Second Thomas Shoal-i osettsü bener oya aliba Philippine indang rong tem dak water cannon khaloktsü aser iba ajanga rong kabo oset bener motstüet.

Beijing-i South China Sea nung tesem timba parnok meyong ta ashir, kong Philippines, Vietnam, Malaysia, Brunei aser Indonesia nung indang exclusive economic zones tem densema lir.

2016 küm Hague nung arbitration panel kati, China-i tzüyim parnok meyong ta ashiba ya temzüng ozüng kübok kecha tamendakdak mali ta shiogo.

Kasa mapang nung Beijing-i, iba obendang ya talenba tashi kecha mali aser ibayongji agizüktsü makok, ta shiogo.

Ben Shelton-i Japan Open kokogo



Mongputeni/October 22, 2023 (Agencies): America nunger lanur asayar Ben Shelton-i Deobarnü Japan Open tebur kija asaya final nung Russia nunger asayar Aslan Karatsev 7-5, 6-1 agi koka mezüngbuba ATP Tour title ka benogo.

Shelton ya taoba küm August ita-ang professional asayar ka aküm saka pa January ita Australian Open nung quarter-finals tonga asayaogo aser taoba ita US Open nunga semi-finals tonga asayaogo.

Arishi küm 21 tain asayar ya Tokyo nung final atongtsü atema asaya aika nung set asem tashi kanga meranga asayatsüsa aküm ajisüaka final nungbo pai world number 50 asayar Karatsev ya ghonda ka ser minute 20 nung koka liasü. Mezüngbuba set nung Shelton-i Karatsev indang serve ka break asüba sülen pa 6-5 agi tejakdang aküm aser iba sülen pa indang serve break mesüdaktsüi asaya akok.

Tanabuba set nung Karatsev-i, pai asayanüba ama masayatet aser iba ajanga pa

kanga tezüdanga pa indang racket court nung züksa, kechiyong pai unforced errors aika mena liasü.

Tanabuba set nung match point aliba mapang Karatsev-i court adena ball züktokba sülen Shelton nem takok agüja liasü.

Karatsev-i iba asayamung nung pa indang asaya ajak straight set nung akokba sülen final tongteta liasü, kong fourth seed Alex de Minaur aser sixth seed Frances Tiafoe na akokba densema lir.

Shelton-i US Open nunga Karatsev koker liasü.

Sevilla-i fan tem anema jenjang tapet agiba Vinicius-i pelashishia agizük



Vinicius Jr

Mongputeni/October 22, 2023 (Agencies): Real Madrid nungi asayar Vinicius Jr pa shilu dak ajemdaker mezüngmeshiba atema fan ka anema kanga kara jenjna agia ketdangsurtem nem osang agütsüba atema pai Sevilla nem tenüngsang agütsüogo.

Vinicius-i social media nung post asüba noksa ka ajanga nisung kati pa anema racist inyakyim ka inyaka sayuba nguogo.

Vinicius-i ashiba agi, pa dangi yokba tanabuba clip ka nung tanur fan kati pa mezüngmeshiba sayuogo.

Iba La Liga asaya sülen Sevilla-i sangdong ka ajanga ashiba agi, nisung ka jangja

stadium nungi mintokogo aser legal authorities nem bendanga agütsüogo.

"Maneni pa anema jenjang tapet agitsü aser pa mintoktsü," ta club-isa ashi.

Club-isa, parnoki racist aser xenophobic yimyatem aitsür ta ashiba den iba amala yimyayimpong raktoktsü atema ketdangsurtem den longjemer inyaktsü mulunga aliba lemsatepogo.

Real Madrid pur tang La Liga nung temaba jenjang nung lir aser parnok Honibarnü Seville den Ramon Sanchez-Pizjuan Stadium nung asaya goal 1-1 nung tembanga liasü.

Asaya tembanga sülen X sabang ajanga Vinicius-i ashiba

agi, iba tatalokba ya 19buba liasü ta ashi.

"Takaritiba nung jenjang tapet agia temerenshi agütsüba atema Sevilla nem tenüngsang agütsür," ta pai zülutsü.

"Tia maka kü ket nung ano Honibarnü racist inyakyim indang video ka lir, kong tanur ka densema lir.

"Nü dang yimyayimpong sayutsü shinga maliba atema kanga sasa bilemer. Ni Brazil nung education nung sen aika intoker, ajita asünungdang iba amala yimya dang nungi balaka nung lisopurtem anitetsü," ta pai ashi.

Vinicius ya parnok indang opponent fan temi aiben mezüngmeshia arudar.

Uttar Pradesh-i run 87 agi Nagaland kokogo

Dimapur, Mongputeni/October 22 (TYO): Tang asaya aliba Syed Mushtaq Ali Trophy nung Deobarnü Nagaland aser Uttar Pradesh na asaya UP team-i run 87 agi kokogo.

Mezüng batting amenba sülen UP team-i over 20 nung run 188 yanglua liasü. Parnok rongnungi Rinku Singh-i ball 34 nung run 58 yanglu, kong four pezü aser six asem densema liasü.

UP batsmen tem rongnungisa Abhishek Goswami (36 runs), Nitish Rana (32 runs), Sameer Rizvi (26 runs) aser Shiva Singh (18 runs) nungeria kanga junga asaya liasü.

Nagaland team bowler tem rongnungi Karan Tewatiya-i asaya tetenzüklen kanga junga ball ona wicket 2 agi, saka pa indang tatembangbuba over nung Rinku Singh-i run 27 yanglua liasü.

Nagaland team bowler tem rongnungi Khrievitso Kense-i (4overs-2wickets, 18runs and 9 dots) kanga junga asaya liasü. Pai Nitish Rana aser Abishek Goswami na indang tongtibang wicket agi aser

Sameer Rizvi run out sütsüba nunga tongtibang shilem agia liasü, shibai kanga junga asaya liasü.

Run arishiba mapang Nagaland team-i run 100 dang yangluteta liasü. Opener ana Joshua Ben Ozukum (15 runs) aser Sedezhalie Rupreo (18 runs) nati kanga junga tenzük saka Bhuvneshwar Kumar-i anir UP bowler tem ball kanga junga ona Nagaland team nung run meyangludaktsü.

Parnok rongnungi Impact player Prashant Veer-i kanga jung asaya-a pai over 3 nung wicket 3 agi aser run 7 dang agüja liasü. Pa indang economy rate 2.33 liasü.

Nagaland team atema Jonathan Rongsen (15 runs) out asüba ya takoksa tulu liasü, shiba Jaganath Sinivas-i kanga meranga asaya ball 17 nung run 31 yanglu ajisüaka kanga menoatoker liasü.

Nagaland team Karnataka den October 23 nü Maharana Pratap College Ground, Dehradun nung 11:00 nungi tenzük asayatsü.

Asia U17 & U15 JBC: Bornil-i gold medal angu



Mongputeni/October 22, 2023 (Agencies): India nunger asayar Bornil Aakash Changmai-i Deobarnü Chengdu nung Badminton Asia U17 & U15 Junior Championships nung U15 tebur kija asaya koka iba asaya nung India nunger rongnungi gold medal anguba tanabuba asayar kümogo. Final asaya nung pai China nunger asayar koka liasü.

Arishi küm 13 tain Bornil-i final asaya nung kanga junga asaya 21-19, 21-13 agi Fan Hong Xuan madak takok ngua liasü. Pai iba asaya minute 34 nung koka liasü.

Bornil, shiba Assam nungi lir, pa ya Siril Verma-i sülen iba asayamung nung gold medal anguba tanabuba asayar kümogo.

India nunger asayar yagi asayamung tepeyong kanga junga asayaogo aser iba mapang pai Honibarnü külem India

nunger asayar Jagsher Singh Khangurra semifinal asaya nung koka liasü

Iba ita tetenzüklen Spokane, USA nung BWF World Junior Championships nung Ayush Shetty-i bronze medal ka anguba sülen Bornil-i tang iba asayamung akokba ya junior circuit nung India nunger asayartem atema takok tajung ka lir.

Kasa mapang nung India nunger rongnungi nungtugu badminton asayartem Hangzhou Asian Games nunga takok tajung nguteta tebur tarep asayar Chirag Shetty aser Satwiksairaj Rankireddy nati tang mezüngbuba gold medal ka nguogo aser iba den tena tarep asaya nung temaba jenjangi tuogo.

Maneni HS Prannoy-i kanga junga asaya-a Asian Games nung tebur kija asaya nung bronze medal ka ngua liasü.

BILEMDANGANG
"Nüburtem dang nungi tashi tali meimba lenir sülen tanidak."